



Infurmaziun davart las surfatschas cun culturas alternantas (SCA) en il chantun Grischun

Plan sectorial Surfatschas cun culturas alternantas (SCA) e prescripziuns legalas davart las SCA

Cun il Plan sectorial SCA duai vegnir segirà il provediment cun victualias durant situaziuns da grevas mancanzas. Cun il conclus dals 8 d'avrigl 1992 davart il Plan sectorial ha il Cussegl federal fixà per l'entira Svizra la dimensiun minimala da SCA (438 460 hectaras). Il chantun Grischun è obligà da garantir almain 6300 hectaras (ha) SCA. Oriundamain steva en il center da la protecziun da las surfatschas da protecziun agricola la planisaziun alimentara e la realisaziun da tala en cas da crisa. Ultra da la finamira principala da garantir la segirezza dal provediment sustegna il Plan sectorial SCA il medem mument directamain ed indirectamain finamiras da l'organisaziun dal territori e da la politica da stadi, uschia p.ex. la protecziun quantitativa dal terren e la garanzia a lunga vista da terren agricul adattà.

En il fratemp è il Plan sectorial SCA vegnì revedì. Il Cussegl federal ha deliberà la revisiun cun il conclus dals 8 da matg 2020. Il conclus dal Cussegl federal vegn cumpletà tras ina retscha da mesiras ch'èn definidas en ils art. 26–30 e 46 da l'Ordinaziun federala davart la planisaziun dal territori (OPT; CS 700.1). La lescha revedida sco er l'ordinaziun revedida cun criteris pli rigurus per il diever da SCA (art. 30 OPT) è vegnida messas en vigur il 1. da matg 2014. Tenor quellas dastgan SCA vegnir enzonadas mo, sche:

- a) ina finamira impurtanta ord vista dal chantun na po betg vegnir cuntanschida en moda raschunaivla senza far diever da surfatschas cun culturas alternantas; e
- b) i vegn garantì che las surfatschas duvradas vegnian nizzegiadas optimalmain tenor il stadi da las enconuschientschas.

Las disposiziuns tenor l'art. 30 OPT valan independentamain dal grad d'ademplement dal contingent per tut las SCA.

Examinaziun da las surfatschas cun culturas alternantas l'onn 2019 tras il chantun e la Confederaziun

En connex cun l'approvaziun dal Plan directiv chantunal Abitadi tras la Confederaziun la primavaira 2019 e cun il repassament dal Plan sectorial SCA han las SCA dal chantun Grischun stui vegnir examinadas sin basa dal Plan directiv chantunal SCA da l'onn 1987. Sin fundament da questa examinaziun èsi vegnì fixà, che las SCA cun spundas d'ina pendenza da passa 30 pertschient vegnian imputadas vinavant, dentant mo per la mesadad.

A chaschun da sia examinaziun ha l'Uffizi federal da svilup dal territori (ARE) fatg valair, ch'i stoppia vegnir fatga – pervia da la metodica utilisada (elavuraziun automatica sin basa da la planisaziun d'utilisaziun e da la cuvrida dal terren) e pervia da las intschertezas ch'èn colliadas cun quaisupplementarmain ina deducziun pauschala da 2 pertschient. Resguardond questa deducziun ed il fatg che

las SCA dastgan vegnir imputadas mo per la mesadad, sche la spunda ha ina pendenza da passa 30 pertschient, importa l'effectiv dad SCA (p.ex. SCA imputablas sin plazzas da golf) actualmain 6544 ha (surfatscha valitada). Uschia è anc adina garantida la dimensiun mini-mala da 6300 ha ch'è fixada en il Plan sectorial SCA.

Survista e preschentaziun da las surfatschas cun culturas alternantas

Sco post spezialisà responsabel fa l'Uffizi per il svilup dal territori dal Grischun (UST) ina survista digitala da las SCA en il chantun Grischun. Questa survista vegn actualisada mintga onn. Il model che vala sco basa per las geodatas correspunda al «Model da geodatas minimal Surfatschas cun culturas alternantas tenor il Plan sectorial SCA» (ARE, november 2015, unidad da geodatas da basa nr. 68). L'unidad da geodatas da basa tar las SCA cuntegna las SCA (SCA inventari) ch'èn vegnidas eruidas oriundamain per il Plan sectorial da la Confederaziun (1992) e quellas SCA (SCA effectiv), ch'èn imputablas actualmain per part u dal tuttafatg.

Preschentaziun chantunala da las surfatschas cun culturas alternantas



 Surfatschas cun culturas alternantas, inventari

 Surfatschas cun culturas alternantas, effectiv

Surfatschas cun culturas alternantas, inventari: Las «Surfatschas cun culturas alternantas, inventari» correspundan a las SCA ch'èn vegnidas eruidas oriundamain per il Plan sectorial da la Confederaziun (1992), independentamain dal fatg, sch'ellas èn actualmain imputablas u betg.

Surfatschas cun culturas alternantas, effectiv: Las «Surfatschas cun culturas alternantas, effectiv» correspundan a las SCA ch'èn actualmain per part u dal tuttafatg imputablas.

Invista e retratga da las datas

Las datas davart las SCA pon vegnir consultadas e retratgas tar il Center da geodatas dal Grischun (www.geogr.ch).